

DODATAK

GRAČANIČKI GLASNIK
časopis za kulturnu historiju

Broj 51
Godina XXVI
Maj, 2021.
[str. 199-200]

© Monos 2021

DODATAK

Glosar novih autora

Adnan Jahić je rođen 21. aprila 1967. godine u Tuzli. Osnovnu školu i gimnaziju završio je u Tuzli. Na Filozofskom fakultetu u Sarajevu, Odsjek Orijentalistika i Anglistika, diplomirao je 1991. godine. Magistrirao je na Filozofskom fakultetu u Sarajevu (postdiplomski studij *Historija Bosne i Hercegovine*) 2003. godine. Doktorsku disertaciju pod naslovom *Organizacija i rad Islamske zajednice u Bosni i Hercegovini između dva svjetska rata* odbranio je na Filozofskom fakultetu Univerziteta u Tuzli 20. oktobra 2007. godine.

Imao je aktivnu ulogu u javnom i političkom životu Bosne i Hercegovine. Bio je poslanik u Predstavničkom domu Parlamentarne skupštine Bosne i Hercegovine i član parlamentarnog izaslanstva Bosne i Hercegovine pri Parlamentarnoj skupštini OSCE.

Autor je više desetina naučnih radova iz novije bosansko-hercegovačke i bošnjačke historije. Primaran predmet interesa su mu teme iz vjerske, kulturne i intelektualne historije Bosne i Hercegovine, te bošnjačke historije prve polovine XX. stoljeća. Objavio je pet knjiga: *Muslimanske formacije tuzlanskog kraja u Drugom svjetskom ratu* (Tuzla 1995.), *Hikmet – riječ tradicionalne uleme u Bosni i Hercegovini* (Tuzla 2004.), *Islamska zajednica u Bosni i Hercegovini za vrijeme monarhističke Jugoslavije (1918-1941)* (Zagreb 2010.), *Vrijeme izazova. Bošnjaci u prvoj polovini XX stoljeća* (Zagreb – Sarajevo 2014.) i *Muslimansko žensko pitanje u Bosni i Hercegovini (1908-1950)* (Zagreb 2017.). Za knjigu o Islamskoj zajednici dobio je nagradu "Hasan Kaimija" za najbolje djelo iz društvenih i humanističkih znanosti objavljeno u 2010. godini. Učestvovao je na brojnim međunarodnim i domaćim naučnim skupovima i simpozijima, posvećenim temama iz savremene historije, islamistike i političkog života Bosne i Hercegovine.

U Tuzli je uređivao časopis *Hikmet*, list za vjersko-teološka i kulturno-historijska pitanja, od 1993. do 1998. godine. Više godina je radio kao nastavnik u Gimnaziji "Ismet Mujezinović", te kao honorarni nastavnik u Behrambegovoj medresi u Tuzli.

Član je Odbora za historijske nauke Akademije nauka i umjetnosti Bosne i Hercegovine. Član je Naučnog vijeća Instituta za islamsku tradiciju Bošnjaka u Sarajevu. Od 2015. do 2017. bio je glavni i odgovorni urednik časopisa Društva historičara Tuzlanskog kantona i Odsjeka za historiju Filozofskog fakulteta u Tuzli *Historijska misao*.

Trenutno radi kao redovni profesor na Filozofskom fakultetu Univerziteta u Tuzli.

Oženjen, otac troje djece i djed dviju unuka.

Hana Younis je viši naučni saradnik u Institutu za historiju UNSA. Rođena je 1976. godine u Sarajevu, gdje je završila osnovno i srednje obrazovanje. Na Filozofskom fakultetu u Sarajevu, Odsjek za historiju, diplomirala je 2002. godine, a magistrirala 2007. godine odbranom rada *“Svakodnevni život u Sarajevu u doba Topal Osman-paše 1861-1869. godina”*. Na istom fakultetu je 2012. godine odbranila doktorsku disertaciju sa temom *“Trgovačka elita u Sarajevu 1851.-1878. godina”*.

Autorica je više monografija, kao i velikog broja naučnih radova objavljenih u Bosni i Hercegovini i inostranstvu. Učestvovala je na više međunarodnih kongresa, konferencija i skupova. U sklopu među univerzitetske sa-

radnje između Bosne i Hercegovine i Arapske Republike Egipat, 2009. godine učestvovala na specijalističkom seminaru iz oblasti Egiptologije, na Univerzitetu u Kairu, dok je u okviru programa ERASMUS + ispred Univerziteta u Sarajevu u periodu 2019. godine boravila na Middlesex University u Velikoj Britaniji.

Obavljala je funkciju glavne i odgovorne urednice više naučnih monografija, kao i časopisa *Prilozi Instituta za historiju*-Univerzitet u Sarajevu. Član je Uredničkog odbora časopisa *Arts and Social Sciences Journal*, redakcije časopisa *Historijska traganja* Instituta za historiju UNSA i časopisa *Prilozi historiji Sarajeva*, Muzej Sarajeva. Također je član Upravnog odbora i jedan od osnivača Udruženja Centar za osmanističke studije Sarajevo i počasni član Arab Women Media Centar (AWMC), Amman, Jordan. Bila je voditelj više domaćih i međunarodnih projekata.